

Date – 03/03/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. **Art & Culture Minister Pu C. Lalsawivunga'n Mizote kut ropui ber Chapchar kut neih hun chu Central KTP general conference neih hun nen a inrual avangin kumtin March ni 13-ah neih tawh tura sawn a nih thu House a hrilh.**
2. **Vawiin chawhma dar 10 leh a chanve atangin Assembly Budget session ni 10-na chu thutkhawm leh ani dawn a, Budget sawihona hun hman a ni ang.**
3. **Nimin khan ZMC&H ah chibawm bawk lian tak chu hlawhtling taka zai a ni.**
4. **Prime Minister Narendra Modia chuan nimin khan Saudi Arabia Crown Prince leh Prime Minister ni bawk Mohammed bin Salman nen Asia khawthlang lama buaina awm mek chungchang telephone in an sawidun.**

<><><>

CHAPCHAR KUT

Art & Culture Minister Pu C. Lalsawivunga'n Mizote kut ropui ber Chapchar kut neih hun chu Central KTP general conference neih hun nen a inrual avangin kumtin March ni 13-ah neih tawh tura sawn a nih thu House a hrilh.

Nimina Assembly Session thutkhawmah zawhna leh chhanna hunah Art & Culture Minister Pu C. Lalsawivunga chuan Chapchar Kut chu Mizote kut ropui ber a nih angin tun aia nasa leh ropui zawka hman nih theih hmalak a nih thu a sawi a, kumin Chapchar Kut chu March thla Zirtawpni hmasa berah hman thin a ni a, hetihlai hian Central KTP general conference neih hun nen a in nan avangin, hemi chungchanga thu thehluh chu Chapchar Kut organising committee chuan a ngaihtuah hnuah sawrkar lam zawk chu a tawlh theih avangin kumin hian Chapchar Kut neih hun chu March ni 13-ah an sawn a, kumtin hman tawh tur a nih thu a sawi a ni.

Pu C Lalsawivunga chuan state danga Mizoram House-ah te Chapchar Kut an hman ve theih nan pawisa dah an ni tih a sawi bawk aa, hetihlai hian Mizoram chhung RD block hrang hranga cheng Aizawl pan thei lote'n an chenna khuaah te Chapchar Kut an lo hman ve theih nan sorkar chuan pawisa a la dah thei rih lo tih a sawi a ni.

<><><>

ASSEMBLY SESSION

Vawiin chawhma dar 10 leh a chanve atangin Assembly Budget session ni 10-na chu thutkhawm leh ani dawn a, Budget sawihona hun hman a ni ang.

Vawiin Assembly inkhawmah hian thutkhawm tan atanga darkar khatah zawhna leh chhanna hun hman a ni ang a. Hemi zawhah Power & Electricity Minister Pu F. Rodinglana'n Mizoram Electricity Regulatory Commission (Fees, Fines & Charges) Regulations, 2025 leh Mizoram Electricity Regulatory Commission (Consumer Grievance Redressal Forum and Electricity Ombudsman) Regulations, 2025 leh Mizoram Electricity Commission (Demand Side Management) Regulations, 2026 te chu House dawhkanah a dah ang a. Chief Minister Pu Lalduhoma'n "The Mizoram Appropriation (Supplementary Demand for Grants 2025-26) Bill, 2026" chu house ah member te pawm pui turin a pharh ang a, tangka kum thar (2026-2027) Budget a tlangpui sawiho anih dawn bakah vawiin hian sawihona hi zawhfel hman tum a ni.

<><><>

LUNGLEI ROAD SAFETY

Lungleia sawrkar hna thawkte chuan nimin khan mahni pisaah theuhah lirthei khalh chungchanga fimkhur tura thutiam an tiam.

Lunglei DC Office-a thawkte chuan DC Conference Hall-ah Additional Deputy Commissioner Pi Zoramdini kaihhruiin Road Safety Pledge hi an chham rual a. Office hrang hranga thawkte pawhin mahni office-ah theuh thu an tiam ve bawk.

Lunglei District Road Safety Committee thuchhuak bawhzuiin, Road Safety Pledge-ah hian fimkhur taka lirthei khalh thin tur leh kea kalte pawh kawngpuiah fimkhur taka kal thin tura intiamin; harh fima lirthei khalh tur te; dan phal chin aia chaka lirthei khalh lo tur te; tha taka Traffic Rules & Regulations zawm tur te; lirthei khalh laia mobile phone hmang lo tur te; kea kal, naupang leh tar chak lo zawkte ngaihtuah reng chung leh mi dangte zai ngai chungah lirthei khalh tur te; kawngpuiah fimkhur tak leh lirthei kal ngaichang chungah kea kal tur te; leh lamliana fimkhur tura mi dang pawh zirtir tur te'n an intiam a ni.

<><><>

ROAD SAFETY WEEK AWARENESS

Department of Hindi, MZU buatsaihin Road Safety Week Awareness hun buatsaih a ni.

Dean Seminar Hall, School of Humanities and Languages, MZU a hun hman ah, Prof. Lalduangliana Khiangte, Dean, School of Humanities & Languages chuan khuallian hun a hmanpui, Road Traffic Accident in Northeast India- Less Frequent, But More Fatal' tih thupui hmangin Dr B.K.S Singh, Padma Shri & President, AIIMS Guwahati chuan zirtirna a pe a. Hmarchhak bial state hrang hrang a lirthei chet sualna a tam tih sawiin, Mizoram chu 2024 record ah Road Accident 124 awmin, mi 112 in nunna an chan tih sawiin India ramah a san ber thu a sawi a, Assam State chu NE States ah Road Accident ah hmahruaitu a nih thu a sawi bawk.

Special lecture hi Department hrang hrang atangin zirlaiten an chhim a ni.

<><><>

OVARIAN TUMOR

Nimin khan ZMC&H ah chibawm bawk lian tak chu hlawhtling taka zai a ni.

Zoram Medical College & Hospital, Falkawn-a Obstetrics & Gynecology leh Anaesthesiology Department ñangkawp chuan Chibawm bâwk (Ovarian tumor) lian tak, hlawhtling takin an zai a, a rih zawng hi kg 33 vel a ni.

Zoram Medical College & Hospital thawktute sawi danin an zai tawh zingah chuan lian ber leh rit ber ani an ti a, hetianga lian leh rit hi Mizorama zai chhuah leh hriat ala ni lo tih an sawi a ni.

ZMC&H-a Gynae Head of Department Prof Vanrinmawii sawi danin damlo an zai chu Manipur Churachandpur Dist a cheng Kum 40-mi Pi Pinglalmawii niin thla 10 kal ta atanga natna avanga puar vek tawh ani a ti a, Hnimhlum doctor te nen tangrualin darkar khat chung vel an zai thu a sawi a, zai a hautak tih sawiin tunah erawh damlo pawh a harh tha tih a sawi a ni.

Prof Vanrinmawii chuan amah bakah Prof Lalrinfela leh Dr Lalhruaimawia te leh hnimhlum doctor bakah nurse te nen thawkho in hlawhtling takin an zai tih a sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



MIZO MARRIAGE AMENDMENT BILL

Mizo Marriage & Inheritance Amendment Bill 2026 Assembly Budget Session kallai meka put luh chuan sawi zui a hlawh hle a, eptu party te chuan ennawn leh tha an tih thu an sawi a ni.

Dampa bialtu MLA Dr R. Lalthangliana chuan tunhnaia Assembly Session kal meka Mizo Marriage & Inheritance Amendment Bill 2026 chungchanga Mizo hmeichhe hnamdang pasal neite Mizo-na a bo ang a Chief Minister Pu Lalduhoma'n a sawi chu dik tawk lova a hriat thu Akashvani News Aizawl zawhna chhangin, a sawi a, mihringte chu thisen atanga inthlahchhawng an nih angin Mizote thisen pawh Mizo thisen a ni reng a ti a, Mizo Marriage & Inheritance Amendment Bill 2026 khawilaiah mah khan Mizo hmeichhe hnamdang pasal neite Mizo nihna bo tur ang zawnga ziak a awm lova a hriat thu a sawi.

Mizorama Congress Party President Pu Lal Thanzara chuan nimin khan Aizawl-a an party Office Congress Bhavan ah thusawiin, 'The Mizo Marriage and Inheritance of Property (Amendment) Bill, 2026' Assembly House a pu luttu Chief Minister 'Sorkar tih a nilo' ti a NGO te pressure avanga bill pulut a nih thu a sawi ta daih chu mawhphurhna lak ngamloh vang a ni a ti a. Chief

Minister bill putluh, House a pass aia sorkar tih thil dang a awm thei lo a, Chief Minister in a hmalaknaah hian midang dem tur zawng lovin mawh la ngam rawh se a ti a ni. Mizo Hmeichhiain mi tupawh pasalawh neiin khawi hmunah pawh, state dang leh ram pawnah pawh awm se Mizo a ni reng ang a ti a. Mizo danah Mizo hmeichhiain pasalte hnam an tawm ngai lo, a ti bawk.

<><><>

PM

Prime Minister Narendra Modia chuan nimin khan Saudi Arabia Crown Prince leh Prime Minister ni bawk Mohammed bin Salman nen Asia khawthlang lama buaina awm mek chungchang telephone in an sawidun a. Social Media lamah he thu hi tarlangin Pu Modia chuan tunhnaia Saudi Arabia beih anih chu pawl a tih thu sawin ram pakhat zalenna leh mahnia ro inrel anihna bawhchhiatna a ni a ti a.. Pu Modia chuan lehlam pawl ve ve ten a hma thei ang bera remna an siam a duh thu a sawi a. Hun harsa tak kara Pu Salman-an India mite a ngaihtuah chu lawmthu a hrilh a. Bahrain in beih a tawh pawh a dem thu sawiin India chuan Bahrain mipuite a tan talta tih a sawi a. Bahrain lalin India mite a chhawmdawlinaah lawmthu a sawi bawk a ni.

<><><>

WEST ASIA

West Asia-a indona hi a zual zel a. Iran sipaite leh Israel leh US tangkawp sipaite hi missile leh drone hmangin an inkap chhonzawm zel a. Iran leh thlawptu sipaite chuan United Arab Emirates, Kuwait leh Bahrain-a US hmun pawimawhte an kap nasa hle a. Hetihlai hian lehlam pawl Israel leh US tangkawp pawhin nasa takin Iran an kap chhonzawm a. Pentagon thuchhuah danin US Defence Secretary Pete Hegseth chuan US thiltum ber chu Iran missile leh navy te tihchhiat vek leh Tehran nuclear ralthuam tihchhiat vek anih thu a sawi a ni. Britain, France leh Germany te chuan Iran bei let a US thlawp turin an inpeih thu an sawi a. Gulf ram dangte pawhin Iran beihna lo chhanglet tura an inpeih thu an sawi a. Hetihlai hian Russia chuan West Asia ah hian inkahhai puan a duh thu a sawi a, civil te bituma inbeihna chu a dem thu a sawi a ni.

<><><>